

癸

巳

類

稿

癸巳類稿卷八

縣俞正燮理初

黟縣山水記

黟縣山起梯木嶺嶺脈來自休寧婺源界之張公山故黟地也
今嶺在縣東南三十五里南則祁門界嶺東北爲天潛山西北
則黃荊菴山又西北爲南屏山山在縣南十里自北望之平起
方疊如屏亦曰城子山其上峭壁斗巖石竇間有龍湫亢旱禱
之輒應上有龍門道院邑志云南屏實南幹祖脈相地家言也
西爲頂遊山東爲林厯山元和郡縣志云林厯山在縣南百五
十里今山在縣南十里依山北百五十里無唐黟治此志誤也
山高二百仞周十里三面壁立徑危仄漢末黠賊帥陳僕祖山
等二萬戶屯其中建安十三年吳將賀齊討卒之史言如此疑

陳僕祖山非賊也保山以禦亂尚未屬吳耳云二萬戶并計山下附之者山上爲帥居也今山上寨址猶存鉏山者時得箭鏃嘗求得之小方而銳銅色紅翠隱然土人卽山爲庵宇明時有林懸書院曰道一堂今不可見庵前有峰員起如香鑪水經注云地理志漸江水出丹陽黔縣南蠻夷中北逕其縣南有博山上山上有石特起十丈上峰若劒杪時有靈鼓潛發正長臨縣以山鼓爲候博山蓋鑪象矣山之東爲垂珠洞洞窈窕石骨相次卽石刻佛像泉自石出四時滴瀝洞口地脣出可眺覽嘗與古築孫君學道田段程君驥登此程君有詩又與崇義方君燮溧陽陳君忒登之方君有詩其西有瀑布自千丈崖下下有石曲環如象垂鼻瀑布由環出上有仙人棋局石曰入夜或見金燈如流星千百飛墜滿野吳時役賊萬餘爾後山空無人居血結

起爲燐積陰相沿鬼火赴此如人赴集場不足怪矣迤西則頂
遊山山東北至縣十二里一日丁峰亦曰南山程君驥登此山
言自下至上可十里上頂可容兩席地自東北望之甚銳山形
如楷字由形者余言此當是丁由山程君曰不然舊有頂遊大
王廟古人稱名之意不可知也又西北山陰爲赤嶺山南爲陶
嶺通祁門又西北爲觀雨畢字亦作坐音追余見官書鱗州如
此又西北爲簾箕塢又西北爲武亭山山東北至縣十八里邑
志云高二百仞西接祁門界山陰武林水出焉山故凹凸出入
亦曰武陵唐地理志云歙州祁門縣有武陵嶺元和中令路旻
鑿石爲盤道宋紹興時黃村黃葆光又就樵徑開通之繼有石
磴自乾隆二十六年安慶爲省會邑中士大夫文書皆繇此道夥
田少常糴米鄱陽自祁門排溪擔負者皆過此古築孫洪維易

以大平石修茶亭爲往來坦途矣又北行爲石母山嘗以重九
興官路下汪君步鼇登此盡望見縣南山內地又北爲虎嶺山
西接祁門界虎嶺武嶺疑是唐時官私之名舊時夥祁路在此
虎嶺下達於排溪余家先世有墓在嶺西年年過此嘗疑此嶺
爲路令舊蹟惜志乘不能詳也又北行爲畫工尖聳秀似刻畫
者又北行屬之西山由縣西望之如屏疊翠千雲特爲明秀或
曰仙山上有石中文長尺餘如足迹趾南踵北相傳爲仙人迹
旁有杖痕又北行爲釣魚嶺一曰相見山山路迴環行久之乃
至舊處對塢而里數已遠故曰相見樵徑皆然也此爲葉村孔
道又東北行爲方家嶺徂徠大星道也又東北行東南起高峰
曰發龍峯又東南下行爲千絲隊又東南起爲美岱山山自楠
木嶺層巒相屬脈絡既明大峰突聳如鸞鶴振翮獨昂雲霄又

東南爲芙蓉嶂自嶂東南至縣十二里穹岫嚴整衆山環拱其陽奇木錦繁靈石棋分自此東南岡阜起伏爲雄雞峰逕南坑綿延至東嶽行祠曰龍尾山上有聖母池碧霞元君祠祠北爲觀音巖東爲靈虛觀觀前石華表上嵌石扁宋大觀元年朱彥記云此地去縣一里許龍尾山環之事載圖經幾千百歲元豐中修觀爲記其事是龍尾山名見宋前圖經明正德十六年縣志亦云東嶽行祠在龍尾山今府縣志僅謂之東嶽山矣觀東北有社公祠曰龍尾大社山又東北行當縣城南門西縣城循山東北麓屬之章水府縣志言城包羅東嶽山非也舊唐書地理志云黟置在黟川卽今城東北之水矣城內山東北行者爲城隍山東行者爲縣學山

自楠木嶺東北分行者曰天潛山志云以多憶君子讀書其中

故名亦曰石林山有餐霞凹指月尖日月關諸勝下有潭曰空心潭左爲佛頭嶺其行七里皆老松蒼翠亂雲煙有蒼蒼亭上爲鬱確屏取孔叢邱陵歌喟然回慮題彼泰山鬱確其高梁甫迺連義也登屏山爲觀海臺謂雲出鋪海也下循溪爲偏閣左行爲天荅街街轉則天荅巖天荅者響山也又東爲脾嶺脾嶺東屬之休寧齊雲山脾嶺東北行爲復山復山在縣東南三十六里高二百六十仞峰孤峻石壁四絕初學記引輿地志云有五根二磔亦謂之五根磔注云根下根反從良得聲今諸書從良非也太平寰宇記亦作五根二磔根磔旁皆有石壇中央有溝才五六尺許水懸出捫蘿挽葛時有至者山陰日復巖聳翠激流至其上石壁立天際如太古朽木如蒲石畫平嶂舊鄉民避寇巖上寇以山上無水思久圍困之鄉民投下生魚示之乃

引去福建德化縣志云酒鑊寨山在縣西高峻乏水昔人避賊賊以久圍困之有女子取酒浣衣以示賊賊謂水多也因解圍去事亦類此天潛山之西有山逕水村考川下插坑屬之李村自林厯山東北分行連山相屬三里許有金竹巖羊腸鳥道上通樵路嘗與程君驥夜飲金竹庵月中上望山巔石亭旁有虎次日問之樵人無見也又東爲黃家嶺十里至竹山下會石山林厯山東行者爲青嶺山亦曰千里山山越所據今居民於山巔植松檜禁樵伐隔山望之林木蔥蔚在雲間亦仙境也青嶺山東行爲黛峰峰有塔院塔七級踞石巔下臨水其山陽爲從坑爲託坑山陰爲規窰青嶺山陽東行者爲喬嶺爲魚亭山咸淳志云婺源浙源山北通黟縣魚亭山是也山在縣東南三十

五里高二百五十仞

自南屏山東北分行爲大星山山有大石言是落星所成一曰大仙山

自虎嶺東南分行爲上堂山宋紹興二十七年靈惠廟碑云其神謂之胥公乾道二年二月一日敕封顯應侯今居民謂之胥王廟山名志乘不載孫君學道讀碑知之

自畫工尖東南分行連岡複阜一屬之黃村一屬之古築古築村東曰東山巨石谿飭桐桂交蔭有泉出石間曰石乳泉泉南有亭曰石乳亭

自西山南分行逕上江村東南逕下江村陳閭張墩屬之余汪村

自釣魚嶺西北分行逕葉村北屬之猷徑山

自方家嶺西分行爲程家山東南逕豐口石柳山方家嶺東北

行爲靈巖北逕黃泥坑大星杜杖屬之石埭廂口

自雄雞峰西分行爲金雞石其南行者一逕灣裏後闌閭山屬之後溪一逕撤家黨屬之月塘一自南坑西行逕七星墩五里脾舒家林黃柏塢屬之鐘山

自龍尾山北分行逕西門亭屬之缸鉢山其東行者一逕石亭東南行爲舊庵山爲缸窰山一逕靈虛觀南行屬之程家莊一逕將軍嶺將軍嶺者吳將軍賀齊廟在焉討山越者也將軍嶺東南行爲鼓樓嶺在今縣城東五里隋海寧縣舊城也嶺東南屬之橫岡前爲橫岡水矣

自方家嶺大山至靈巖東行西轉爲石鉢孟山山高五百仞延袤三十里有巨石廣數十丈中坳如盂孟中雲起則天雨諺云石盂戴帽田不慮燥以西南行爲碧山有泉名靈惠清冽異於

常泉山面東南高百仞與霽峰尖對峙自魚亭入夥至石山始
開陽西北望碧山峰環百里此山爲鎮衆山麓舊有太白樓或
言唐李白常棲此白終南詩云暮從碧山下山月隨人歸碧山
乃終南謂夥碧山事莫能明宋羅願以至夥歛之李白爲南唐
學士李白事近實矣石鉢孟山又東爲章山山在縣西北二十
里其麓章水出焉循水西南出爲視溪山逕石亭屬之厯下榆
村麻田蔡村江家段沙田章山東行爲九龍山南行逕白干蓬
下四嶺九蓮山屬之古城村章山北行爲長坑山屬之太平米
坑章山東北行爲太陰尖在縣北二十里其山面北前有官鋪
田自太陰尖南行爲石油山有山庵宋嘉定時建或云其時山
石出油供僧廚僧欲以賣錢油乃不出今流泉尙有油香斷碑
猶存按續漢郡國志酒泉郡延壽縣注云縣南有山石出泉肥

如糞肉泊如不凝膏謂之石漆西陽雜俎物異云高奴石脂水如漆可膏車然燈石油蓋此類夢溪筆談言石油似淳漆延安府志云延川縣北九十里有石油井出石油六月收以塗瘡疥亦曰脂水亦曰石液南雄州志云州東北百二十里有油山高數十仞旁有小穴出油人取以爲利益所在有之石油山南行爲風來嶺風來嶺南爲戢兵山一日戢矢山在縣北十五里舊曰石鼓山高百仞周十里新安志云唐天寶六年改爲戢兵引邑圖云有石如鼓有石人石驢諺言鼓鳴則驢鳴人哭而長官不利後鑿破遂不復鳴按太平廣記引歙州圖經文與邑圖同則鼓破在唐以前矣自石鼓山一南行逕軸里北莊屬之軸上山水光色如展軸看畫焉一東南行逕嶺下至屏山山椒倚上其上疊石積翠東南行爲吉陽山吉陽山在縣東北十五里新

安志云高二百五十仞周三十五里上有三峰並起斜倚如積
髻曰三姑尖初學記引輿地志亦謂之靈山山多石三年一過
野火盡燒故老謂之三姑磨新安志云若非磨年百姓放火輒
有雨滅之按磨讀折磨之磨佛家謂之魔劫神仙謂之厄會皆
以年紀也新安志又云中峰有瀑布泉寰宇記云吉陽水出焉
又引新安記天將雨此山先有鼓角之音人以爲準亦曰東山
有仙人石仙人怨邑人舒道翁遇異人傳養生訣構庵山前時
有雙鶴來往之異吉陽山東爲石印山山上有石平方特起下
有石燕洞幽邃可容百人昔有頭陀居此每擊磬則羣蛇出赴
洞西有產龍石石分列一在山下一在山上凹龍形自吉陽
南行之山盡石山挹秀橋與竹山下對峙吉陽山東行爲東文
嶺一曰東頭嶺又南行逕朱嶺下屬之石山東南行逕西遞東

爲長演嶺故魚亭道也又南行一屬之循洋臺與黛峰對岸或以爲潯陽岱峰蓋行人游戲之目黛峰青嶺相接以石邑言循洋水較深矣長演嶺南一東行屬之嶺山卽黟山水經注云浙江又北歷黟山縣居山之陽故縣氏之其說是而此山素不表見也山亦曰石墨嶺下有井寰宇記云在縣南十六里是昔采墨之所今爲懸水所漂其井轉深卽今墨穴也今采其墨僅染阜耳按舊唐書地理志云黟漢縣屬丹陽郡晉同黠縣縣南墨林山出石墨故也今求晉同黠縣事無所出當是音同黠之誤其言黠縣之名由墨嶺是古說本取黠山爲義元和郡縣志亦云縣南有墨嶺出墨石又昔貢柿心木縣由此得名是唐時以石墨爲可用之物可書字出述之者不明顯著書者以意度之實則石墨卽石炭今假借字爲煤黠邑惟此有煤又煤苗不盛

稍采入卽爲懸水所漂利小而害大此古事之鑑江南西道煤
所在有之不聞以名縣尤不聞以染阜也石墨嶺上或言亦有
靈鼓潛發令長候之以占吉凶又東行爲樵貴谷按寰宇記引
輿地志言樵貴谷在鄠北昔人入山七日至一穴豁然盡開周
三十里中有十餘家云是秦人避地者新安志亦同今縣北二
都言有樵貴谷地與古應墨嶺下實在縣東南而深山峻谷林
樾秀助亦靈境也元孔齊至止直筆云潘教授言縣有深山入
可數百里老民百二三十歲嘗見大木片長數丈廣二三丈木
釘相連不用鐵土民不食鹽醬寰宇記又引邑圖有潛村入石
洞口悉爲松蘿所翳每求鹽米晨出宋時見有數十家同爲一
村新安志姓氏云號爲潛氏迄宋潛姓數十家南唐劉崇遠金
華子雜編云嘗有新安人說本邑深山中有一水居人飲此水

率皆長壽儘有二百歲者鄉人謂爲仙源是亦潛村之類康熙
時府志則云黟地不及百里豈有山行七日之遠不悟山行多
曲巖壑杳深踟躕攀崖百里之間彌歲難窮宋人言之猶是述
古元人方言近事靈異遊蹤非俗情所當糾也汪君文臺云梁
書海南傳云黃武五年大秦賈人秦倫至交趾送詣權時諸葛
恪討丹陽獲夥歛短人權以男女各十人送倫南史亦同按黃
武五年全琮討山越恪後九年嘉禾三年討山越六年平之則
黃武五年不當有恪所獲蓋全琮越俘之短者非別有短種古
事或記載未審不當糾也石墨嶺又南行爲石門山山在縣東
南二十里壁立數百仞下瞰溪潭鑿石爲門開一徑僅通人石
絕處橫貫木置板以行曰棧閣石門一日小劔門宋建中靖國
時有縣令朱天錫題字今燒鑿山石易以石道又南行爲桃源

洞山骨秀出臨水道鑿石入五尺許就石崖突出處爲屋於門
題之爲洞府縣往來官路也自樵貴谷東行南屬之石門坦自
東頭嶺東爲源嶺又東南爲靄山山在縣東南二十里其峰巖
重如人大坐又東南爲巖嶺屬之墮潭自巖嶺南行爲艾坑一
西南行爲靄岡一南行爲張坑一東南行屬之界首休寧界自
石鼓山東行者爲北莊嶺東北屬之奇墅自太陰尖西北行者
爲五溪山山在縣北六十里山北有五溪常有雲氣隱蔽其上
山半有石崖下有龍湫歲旱禱者以壺取水水涌壺中者霖雨
隨至其北屬之太平界五溪山陰舊屬石埭秋浦後集云五溪
山在縣南百二十里上有五溪合流而下歸於舒溪至魯港入
江是也太陰尖東北行者爲羊樓嶺踰嶺程十五里嶺北有數
十家曰樵樹下亦曰牯驛樵樹牯驛音相亂也自江寧至黟

羊棧爲捷道向置鋪遞府志云寇自池發者警先黜謂此路也
又北屬之太平油竹坑羊棧嶺南有石門嶺巖石深峭春雨後
瀑布懸飛有勝致羊棧嶺東行爲牛泉山山在縣東北五十七
里志云高九百五十仞寰宇記引輿地志云牛泉嶠通廣陽縣
自下上九里一頓凡九頓山常風樹合抱而高不至丈當頂有
泉方丈餘俗云牛跑所致亦猶虎跑泉也山上僅通樵徑雖盛
夏亦衣襦側徑時有斃石處蓋舊通廣陽道廣陽卽南陽隋唐
縣唐省入涇卽今石埭西北之陵陽矣其北則爲牛泉坑其南
爲邕溪源牛泉山南行爲黃堆山山在縣北三十里山頂平曠
昔泗州西峰五溪結茅於此曰西林寺今山上有大聖庵西林
遺址也黃堆山南行爲雷阜屬之雷岡頂黃堆山東北行屬之
懸舍黃堆山東行爲梓嶺下爲梓路寺南屬之東山珠嶺黃堆

山北東行者屬之休寧潘村自梓嶺東南行一屬之潭口一屬之珠川一屬之大周山山在縣東南二十二里石壁幽峭芳叢蘭坂香潔靜明延佇者忘疲矣一屬之天井山山在縣東南二十五里山麓有府均井禱雨有驗目曰府均勝井府均之名莫能明也又南行逕程村屬之休寧西源嶺自黃堆山北行者逕里仁屬之休寧雙嶺又東爲黃山自楠木嶺至此岡巒連絡不斷迴環盤互止一山也其上自楠木嶺至方家嶺爲寧國山行脈自楠木嶺至雙嶺爲杭州山行脈

黟縣亦有六一會於石山曰章山南水曰石鼓山水吉陽山水曰方家嶺南水西武嶺水一會於魚亭曰石山水曰潘山水託坑水曰金村水插坑水石門坦水曰魚亭水一會於霽岡曰魚亭水曰霽山水一會於休寧東亭橋曰羊棧嶺南水吉陽山

東水一會於休寧東夾溪橋曰東坑水而東亭以上水會之以下爲新安江一會於石埭河口曰方家嶺北水曰章山北水曰羊棧嶺北水皆入大江

章山水漢志所謂漸水也其南源南行逕章溪過水口廟下石鉢孟山水自西北來入之南逕規溪山石犖确水行如在規中出規溪尼菴西石壁有宋汪綱等遊記下過西門橋逕何村爲放生處溪水渟流魚聚影焉東南逕厯下舊曰厯陽里有唐建精林院又東南逕榆村又東南合石鉢孟山西水曰雙溪石鉢孟山西水東南行東北納霽頭水逕芙蓉嶂東下爲塢口又東南逕百戶村百戶村有三明王用從太祖戰死敵世襲百戶子孫以爵名村矣又東逕黃衣坦又東入章水爲雙溪雙溪下有石堤捍水使北明嘉靖時王也堤之西南有梁時舊注入今城

西北隅出今迎靄門右東達於黃姑墅以溉田曰橫溝今溝上皆民居歲二月啟濬以爲常章水循堤東北行至和尚塍塍所以護廣安寺後地畝也初章水由紅鉢山下至今城西北一由東北出廣安寺後自堤成而水俱北行塍成而水折而東南逕城北門廣安寺前又東逕東門梅溪又東南至江家段沙田而會石鼓山水吉陽山西水

石鼓山水出山南南行風來嶺水自北來入之又南行蓬下水自西北來入之又東南行北莊水自北來入之又東南逕朱村屏山水自西北來入之又東行爲吉陽山西水吉陽山亦曰三姑山黟縣山水紀略云昔有三女飛行吉陽水上或叩之曰余石埭人也遂不見水上有三鯉魚余按陶潛搜神後記任昉述異記文選劉孝標重荅劉沼書注引宣城記並云宣城臨城縣

蓋山上有池舒姑者性嗜聲音化爲水聞歌則泉涓涓流有朱
鯉一雙以圖畫證之爲今石埭舒姑山吉陽水上三女子殆舒
姑歟又西南行逕古城又南行逕古溪獅坑水古城水自西來
入之田段程君驥葉村葉君有廣好小學及地里嘗得古溪西
故渠窪地溯行過高圻至廣安寺後長生橋曰古章水分出此
故舊志乘言夥者若元豐九域志以吉陽爲黟川所合多也今
則章水源遠而合多吉陽入章水矣石鼓山水吉陽水自古溪
南行至沙田入章水又南行逕東山下過橫岡橋東會方家嶺
南水西武嶺水

方家嶺南水出嶺南其東源許思塢西源冷水坑合流東南逕
程家山又南逕豐口爲豐溪又南逕胡村納霍溪水霍溪水出
釣魚嶺北會於胡村南行逕後關又東南逕陳閭山下又東南

逕後溪至余村月塘水自西南來入之西合西武嶺水西武嶺
名武亭山一名武林山謂浙武林水出此一名武陵山謂水爲
武陵源影有桃源之稱由武陵也水出嶺下東北東逕官路下
又東畫工尖南水虎嶺水泉石嶺水自北來入之又東行北納
黃村水南納赤嶺水又東行逕古築頂遊山水逕下洪山來入
之畫工尖北水自西北逕烏石注西千田舍來入之又東行陶
村水自南來入之陶村在頂遊山東北其居曰五柳舍靖節里
蓋淵明後裔又東行過古村心驛北過萬松橋橋材言一石成
之石由蛟水送至嘗過其橋三空工綴垛欄階路割切石材八
百餘其事可言奇矣橋南有萬松亭旁有醴泉其地獨高南屏
山水自南來入之又東行林厯山水自南來入之南眺博山去
水不遠程君驥言水經漸江注云逕其縣南博山讀史方輿紀

要浙江海引防險說云浙江之源始於黟之林厯山一線之源合流萬壑是依酈道元言浙源爲武嶺水程君居田段葉君居村心孫君學道居古築三人皆能道古皆家臨此水共持此議水又東行至汪村合方家嶺南水逕余村東余村於此構雙溪書屋又東行逕田段北又東行過閭場舒家林水舊庵水自北來入之間場當縣治南古橫江所由名也瀾文波色有浩渺煙霞之觀矣又東北行過葉家灣會章山南水石鼓山水吉陽山西水東行至石山

石山會諸水在縣東南十里連山夾峙播液發靈清淺則鳴漱盈滿則奔駛東至潘山東頭嶺水自北來會之

潘山水出東頭嶺南逕西遞東又南行西遞西水自北來入之西遞在府西舊爲鋪遞所由東頭嶺東路則出凍亭橋西遞水

又南行長演嶺西水自東來入之山壞樹木蒙密春花上浮木杪望之不見土石又南過十里鋪橋又南行出潘山東行合石山上水託坑水自南來入之又東行逕黛峰下望塔院趾盤嶠挺東逕規竈迴沈澹洄最深靜處也金村水自北來入之

金村水出長演嶺南會石墨嶺西水逕金村出規竈會經流東行逕循洋臺山後舊有龍屯依山踞崖泓水澄澈人屢擾之龍乃徙去循洋水中釣臺矗立波際乾隆戊申邑人王穀程學禧胡德謨等於崖間新開魚亭路構亭以息行人巒影送青波光激素質擔息肩者亦躊足掉頭若有評賞則知雲水怡曠智愚同心矣又東逕金鐘潭俗言黃堆山西林寺舊有金鐘朝旨昇進鐘至此入水金石交不解遂棄之山水相遭自傳空籟耳佞佛之言固難究詰也又東行石墨嶺東水自北逕樵貴谷來入

之其地舊有桃源書院歲久傾廢又東逕桃源洞下又東插坑水自南來入之又東南逕石門坦石門山水自北來入之又東南行至魚亭會魚亭水亭在縣東南三十里在魚亭山北五里寰宇記云西江魚船至祁門縣舍舟登陸止此東水次淹留待船故云魚亭咸淳志云黟舊有四亭入墅魚亭其一也方輿家以爲停留之停未知是否按魚亭之魚必不指西江魚船若亭墅之亭本是停留之義亦不須疑也八墅今止有奇墅

魚亭水出楠木嶺東東行至水村會黃荊庵山青嶺山水東行逕喬嶺瑪川至魚亭出永濟橋東南逕攏風灘灘上舊植柳數百株曾經流東南行考川水自西南逕李村來入之脾嶺水自南逕霞阜來入之又東南會露岡水

露岡水出源嶺南逕上坑又東南逕露山東又東南逕苦竹林

又南逕艾坑又南至鵲岡會經流又東行復山水自南來入之
又東入休寧界

休寧東亭橋在黟界東十里故黟地也納黟羊棧嶺南水水出
嶺南南行逕盧村考溪源水自西北來入之又南逕際村邑溪
源水自東北來入之又東南行十都南湖水自北來入之南湖
者十都引邑溪水環注村中而瀦於湖上植桃柳其水淵渟荷
菱發香鱗遊不浚湖東偏有石特高起湖水由堤下出又東南
行橫山梓嶺水自東北來入之又東逕東山下北莊嶺北水自
南來入之又東過珠嶺下裏田方坑水自東北來入之又東逕
奇墅又東爲魚山溪又東逕社禾木坑水自北來入之吉陽山
東水自南來入之又東南逕潭口阜嶺水自北來入之又東行
珠川水自北來入之又東南逕木魚大塢水自西來入之又東

逕王村王塢葉村水自北來入之又東南行源嶺東南水吳村
水自西來入之又南逕程村府均水自北來入之又南逕噎潭
潭在縣東南三十五里石壁削立水觸石盤渦面狹底闊深不
知尋丈宋嘉定時歲旱郡守禱祀得雨爲立龍神祠潭南岸有
怪石三數卓立如人鄉人呼爲石新婦又南行出東亭橋休寧
謂之北源水至白茅渡會靄岡以上水新安志記吉陽水云至
白茅渡入縣界專言吉陽水者時章水入吉陽也云入縣界者
蓋休寧記納黟水之文羅君誤編入黟縣中其致誤之由可知
今府縣志乃言吉陽水過噎潭白茅渡會橫江章水出石山是
讀宋人之書而不知其意又不知吉陽有東西兩水而移噎潭
白茅渡於古城古溪沙田之間不辨地里所在矣

休寧東夾溪橋在黟縣界東三十八里故黟地納黟東坑水水

出東坑東行逕里仁又東南行夾溪歷舍水自西來入之又東南行梓坑水自西來入之又東行入休寧潘村界阜嶺北水自南來入之又東逕休寧藍田出東夾溪橋休寧謂之夾源水會東亭以上水東行爲新安江下爲浙江古漸江水也漢書地理志云丹陽黟縣漸江水出南蠻夷中宋祁校云漸水入沅疑此無漸水漸字當作浙字此宋時官校交課者之妄也羅願新安志云漢志蠻夷中唐盧播注山海經引之作率山今休寧張公山與山海經合說文云漸水出丹陽黟南蠻中戴氏震云漢志夷字衍蠻中應作率山今檢漢書地理志言出徼外出塞外者水首見此縣而源在徼塞外也其源在此縣而地未闢者則言出蠻夷中北地郡歸德縣云洛水出北蠻夷中郁郅縣云泥水出北蠻夷中漁陽郡白檀縣云濡水出北蠻夷中

此濡卽潏唐本誤作油顏

注呼鵠反此依水經 與此南蠻夷中相對知蠻非率誤中非

山誤夷字非衍說文落夷字耳言蠻夷者吳志屢言討平山越
後漢書度尙傳言杭徐試宣城長悉移深林遠藪椎髻鳥語之
人置於縣下由是境內無復盜漢時南方置縣皆大如今湖南
地兼苗族臺灣地兼番族時山越卽蠻夷由戶籍不同今張公
山自有水入漸江校量道里章水源更遠也

會於石埭河口者黟之方家嶺北水水北行逕王村又逕猗徑
壩上水自南來入之昔嘗讀書猗徑汪氏莊屋在水東常倚徙
橋上俯視碧流澄澈念謝華啟秀有義山語云長溪清潄流影
不去文境符合而李義山集中無此語蓋佚篇矣又北逕大星
其北雙河口葉村水自西來入之葉村山水敞靜夏夜無蟲
又自雙河口東行至柱杖村石埭大猗嶺西北水自西南來入

之又西北行至廂口又西北行至太平林村章山北水自南來入之

章山北水北逕章溪出水案有長坑水自西來入之五溪山水自東來入之又北逕太平登塔橋會於林村又會於石埭河口羊棧嶺北水出嶺北逕樵樹下北行牛泉山牛泉坑水自東來入之又東北逕太平油竹坑宏潭會於石埭河口由涇南陵蕪湖入大江高淳縣志丹陽湖有三源其一出徽州府黟縣者爲舒泉按舒泉以經石埭舒姑泉下得名其入高淳湖亦以東壩未築時言之

黟水清而不寒其味甘水深淺皆見底多石骨邑人多飲井水味尤腴云水從土中過能養人船至魚亭簾至石山

駐劄大臣原始

太宗文皇帝滿洲國天聰九年得傳國璽於元小王子裔察哈爾林丹汗先是林丹汗屢犯邊睿親王征之林丹汗走死其蘇泰福晉以其子額哲籍畝來歸封額哲親王游牧義州於是時外藩蒙古十六部四十九貝勒及土默特天聰三年來歸兩旗會於天眷盛京台辭上

尊號明年太歲丙子改元是爲我

大清崇德元年崇德三年正月左翼土默特天聰六年來歸奏喀爾喀

札薩克圖汗犯歸化城二月丁酉

太宗親征出邊科爾沁天命四年來歸札賚特命天命柰曼天聰元年教漢元札

魯特二年阿魯科爾沁六年四子部落七年茂明安八年巴林二年翁牛特

年七烏珠穆素年十一部從征又郭爾羅斯都爾伯特以天命時來歸吳拉忒喀拉沁天聰七年來

歸蒿齊特克什克屯天聰八年來歸阿霸孩蘇尼特鄂爾多斯
天聰九年來歸未赴調不列又阿霸哈納爾於崇德時來歸皆
爲內札
薩克
王子過興安嶺而明之邊臣懼喀爾喀侵軼以

大清兵報示之喀爾喀探之而信遂遜是年明崇禎十一年也
三月喀爾喀三汗使來六月設理藩院治各蒙古事七月丁卯
諭遣喀爾喀使漠北喀爾喀西域厄魯特皆元故臣也元裔察
哈爾既臣服而札魯特奈曼敖漢巴林又喀爾喀舊部故

太宗諭召喀爾喀喀爾喀亦元青吉斯汗後也是年厄魯特伊
札胡圖克圖下宰桑十七人來朝七年西藏黃教第五輩達賴
喇嘛班禪胡圖克圖和碩特顧實汗使人來朝約同行善事第
五輩達賴阿旺羅卜藏嘉睦燦顧實汗孫也先是唐古特四部
曰青海曰喀木曰衛曰藏顧實汗逐唐古特并自處青海喀木
而以藏衛處達賴班禪乃逐紅帽大寶法王花帽二寶法王黑

帽三寶法王是以額實汗與達賴班禪三使同來時自藏衛青海東北行阻於喀爾喀額實汗又與別部厄魯特不睦使者自言繞仇敵之國行經四萬里也始者蒙古番子尙紅教宗喀巴者爲觀世音化身學紅教於薩迦廟而忽歸黃教二弟子達賴班禪轉世行教持咒至驗當明中葉時已出紅教上番部向服喇嘛下設第巴第巴下始爲汗王東西南北數萬里視爲天神喀爾喀以入藏隔於厄魯特則自別奉大喇嘛哲卜尊丹巴胡圖克圖而亦本於宗喀巴藏衛二喇嘛卜言東土有

聖人出當一統故遣使貢方物以振興黃教爲言八年

賜達賴班禪書喀爾喀託雅泰等來歸時欲全收喀爾喀而

太宗賓天

世祖章皇帝御極受朝時喀爾喀使臣在列也是年天下定三

部喀爾喀無事順治二年撫顧實汗鄰部西寧暨河西各土司
三年蘇尼特騰吉思與睿親王不合偕公主北走投喀爾喀我
兵追之圍舍圖汗子及碩雷汗子以兵五萬迎騰吉思我師敗
之初喀爾喀欲害公主騰吉思哭曰

太宗皇帝仁育萬國我奈何背恩害公主耶喀爾喀乃止我師
亦迎公主還五年喀爾喀來犯喀倫敗去六年二月睿親王征
姜瓖欲並征喀爾喀行三日馬瘠道乏水止八月瓖誅十月徵
敖漢札魯特察哈爾烏喇特土默特四子部落兵征喀爾喀至
喀屯布拉特不見賊而還七年厄魯特渾台吉使來朝九年達
賴喇嘛朝

京師築北黃寺居之其行也

接見於

南苑德壽寺

賜金冊印遣王貝勒等護送之

賜厄魯特額實汗金冊印十年圖舍圖汗車臣汗兩部喀爾喀掠巴林部又來索歸順同部蒙古

命宣威大將軍安親王岳樂討之尋以喀爾喀人貢撤兵十三年厄魯特糾邊夷入犯西寧劫奪牛馬拒官兵

詔大臣至西寧衛訊理按例賠償番子在明屬蒙古者歸厄魯特聽納進其舊屬明者役於中國厄魯特不得爲寇災番子自西寧北沿甘涼西至回地南自河州以南至四川各邊抵察木多南迄雲南在唐爲吐蕃後分二三百部不相統忽弱忽強明人謂之海寇明季厄魯特自甘涼北邊越中國地橫侵之遂役

於厄魯特厄魯特居青海者和碩特最強其他土爾扈特輝特

喀爾喀寄牧十八家時時盜竊遂移臨鞏總兵於西寧衛以鎮之十七年

詔禁歸化城喇嘛私往厄魯特喀爾喀十八年

賜喀爾喀丹津喇嘛敕印時喀爾喀七部跳梁漠北厄魯特四部據西域緯羅斯特渾台吉最強盛伊犁雅爾額爾奇斯烏魯木齊巴里坤縱橫五六千里皆所轄和碩特額實汗旣據青海又以兵入藏滅藏巴汗據有其地之圖伯特衆勢俱張盛甚世祖時天下初定

聖祖仁皇帝嗣位四輔臣未遑治也康熙三年喀爾喀貝勒古木布伊爾登來歸四年台吉巴爾布冰圖來歸十年禁藏中唐古特喇嘛無故來京十三年

賜喀爾喀札薩克阿海岱青喇嘛敕印時吳三桂反三桂與達

賴喇嘛通好達賴爲三桂請赦罪不許十四年察哈爾布爾尼反先是額哲卒弟阿布奈襲阿布奈以罪禁錮立其子布爾尼至是吳三桂反調其兵南征布爾尼遂反

命撫遠大將軍信郡王鄂札及副將軍圖海討之布爾尼走至札魯特貴勒蘇台科爾沁部沙津赴調遇而射之殪乃分其衆爲八旗移宣化大同邊外西至歸化城東至克什克屯北至內札薩克各旗南自太僕寺牧廠中抵朔平邊是年青海諸番部與厄魯特戰有功十六年厄魯特綽羅斯特破青海和碩特初綽羅斯特渾台吉卒子僧格立僧格爲其兄車臣巴圖魯所殺立其子索諾木阿拉布坦僧格弟噶爾丹入藏爲喇嘛還伊犁殺索諾木阿拉布坦而遣使乞封於達賴喇嘛達賴喇嘛封爲準噶爾博碩克圖汗是爲準噶爾其款曰厄魯特其部曰衛拉

特古曰瓦拉其居曰伊犁其派曰綽羅斯特噶爾丹旣立取青海和碩特車臣汗女而往青海殺車臣汗擄其人畜歸五月甲午使來告功進所獲弓刀

聖祖却之是時

聖祖方銳意討三藩亦未暇治噶爾丹噶爾丹經歷旣多能忍多謀所屬人又最强悍耐苦戰其所破者同部之撒馬爾罕布哈爾哈薩克布魯特葉爾羌喀什噶爾葉拉木土魯番哈密皆素號強富敢戰之國噶爾丹所向皆摧服屬之又約束都爾伯特輝特南向威令至衛藏喀爾喀者全據古北匈奴地元人所以起也西域原所制自厄魯特日習戰鬥武藝遂強喀爾喀自阿魯泰時已不及之其地背負俄羅斯俄羅斯爲近百年域外絕大之國東南接漢南則又皆我內札薩克以是局促益不及

厄魯特又內亂年饑人心離散圖舍圖汗又執札薩克圖汗殺之而奪其妾策凌三部亂

聖祖憫之二十五年春使大臣偕第五輩達賴喇嘛使爲之和解第五輩達賴已於二十一年死矣初達賴旣立噶爾丹又通吳世璠雲南書噶爾丹以爲可挾而逞也及其死則使藏第巴桑結僞爲達賴猶在者言喇嘛入定不見人中國未之知也達賴使行噶爾丹使其弟多爾濟札布台吉隨覘之以圖舍圖汗待達賴使無加禮罵圖舍圖汗圖舍圖汗怒殺多爾濟札布台吉與師攻噶爾丹噶爾丹大憤謂喀爾喀大悖逆不敬佛乃敢輕蔑喇嘛使又殺其弟遂使喇嘛千餘人入游牧於喀爾喀二十六年九月圖舍圖汗以噶爾丹分兩路入占牧地出兵迎擊不勝卽亦安之噶爾丹黨揚言借俄羅斯兵且至矣喀爾喀探

之無其事喀爾喀守備懈而噶爾丹言之不已至十七年

聖祖遣理藩院尙書阿爾尼備邊兼約達賴喇嘛使和解之噶爾丹故與謀達賴喇嘛事者使至又偏護噶爾丹噶爾丹旣至則壓喀爾喀而軍游牧喇嘛從中應之圖舍圖汗倉卒拒戰大敗傾國東走時俄羅斯方與我爭雅克薩用兵四十年矣聖祖意不欲與戰俄羅斯新汗亦請和旣有成約內大臣索額圖等奉使經喀爾喀東郭車臣汗地喀爾喀揚言

大兵來救已六月庚申使來乞援使臣不許阿爾尼亦入於軍丁卯噶爾丹具書來使臣具檄曉諭之得畢使事噶爾丹復踐之喀爾喀部落散亡牲畜盡其地皆空噶爾丹據之圖舍圖汗札薩克圖汗子厄爾克阿海巴朗車臣汗子烏墨特及哲卜尊丹巴胡圖克圖前後糾餘眾投漠南叩關求撫

聖祖以此

太宗聖意也收而贍養之又以曲在喀爾喀

遣使慰噶爾丹使率眾西歸噶爾丹兼有西域回部青海漠北則益驕蹇不奉

詔二十九年侵託多厄爾德尼又揚言來侵昆都侖五月遂犯汎界至烏爾會河當是時

聖祖既平三藩定隴蜀收臺灣和俄羅斯天下無事以噶爾丹勢熾既入犯其志不在小且喀爾喀不可使無游牧也六月辛丑集大臣於朝

下詔親征賊既破喀倫復東趨越烏闌布通而南距京城僅七百里甲申遣人齎

敕諭之七月乙未撫遠大將軍裕祿親王福全師出古北口壬寅

駕至邊牆噶爾丹入來其書言喀爾喀我仇也因追之闕入

天朝汎界我在

大皇帝道法中不敢妄行因乞圖舍圖汗及哲卜等丹巴胡圖
克圖乙巳安北大將軍恭親王常寧師出喜峰口康親王信郡
王奉

命屯歸化城噶爾丹書以六月二十七日丙戌發明日丁亥噶
爾丹北去至烏蘭布通撫遠軍及之噶爾丹大敗奔高山頂相
持久之始得去我師追之噶爾丹頂威靈佛立誓不復內犯捷
奏至烏朱穆秦

御營八月己未朔

迴鑾丙寅

還宮丁丑

會同出征各佐領下各十數人留備之餘俱撤歸十一月甲辰
噶爾丹使達賴喇嘛領厄魯特各台吉上

尊號

聖祖既疑達賴喇嘛數偏護噶爾丹長惡作惡無勸誠意其道
行不類噶爾丹又久據漠北不肯歸虛言頌揚無爲也却其表
貢物發還三十年四月丁卯

聖祖出塞五月

駐蹕獨石口外多倫諾爾喀爾喀三汗哲卜尊丹巴胡圖克圖
及各台吉朝見皆還其職以其七部爲三部東路曰車臣汗烏

巴什中路曰圖舍圖汗察珞多爾濟西路曰扎薩克圖汗策妄

札布爲三十七旗

此本數也今茲
息八十二旗

暫指游牧地使比內扎薩克

四十九旗

本五十九旗歸北城土默特兩旗
察哈爾八旗皆不世襲不在此數復

卷八

卷八

五

求日益舊

詔建彙宗寺以示興黃教癸卯

遷京師三十一年以前征噶爾丹時烏鎗便利立火器營朝鮮國王進烏鎗三千桿得

旨嘉獎永停朝鮮黃金及藍青紅木棉布貢三十二年達賴喇嘛入貢

賜第巴桑結爵藏王罷西寧番族給蒙古納進例是年噶爾丹兩遣人窺根敦岱青三十三年正月噶爾丹居庫克朝東之杭幾爾察克窺根敦岱青無所獲遂侵喀爾喀又誘喀爾喀札薩克叛歸舊游牧喀爾喀以

聞是年

賜西藏第巴金印

頒三十四年時憲法列蒙古各游牧節氣三十四年二月噶爾

丹奏索圖舍圖汗及哲卜尊丹巴胡圖克圖七月又奏言之八月犯汎界至克魯倫河搶掠那睦札爾託音

貂衫穆巴岱青墨爾根濟農謹備之噶爾丹使私約喀爾喀圖舍圖沙津爲內應夏

駕行圍木蘭沙津奏之得

旨誘之來於是噶爾丹進屯巴顏烏闌三十五年二月丙辰聖祖親征出獨石口過噶爾圖至西巴勒台

遣人諭之且告以

皇帝出塞爾當來決戰若不戰而逃是無恥也噶爾丹亦僞言傾國東來且借俄羅斯兵六萬至

大軍遂進至枯庫車爾噶爾丹猶不信

親征也內行至克魯倫河登北孟納蘭山望見布隆

御營黃幄布城網城大驚遁去五月

駕至克魯倫河獲其輜重噶爾丹趨西路軍於土喇河於是北路平北大將軍馬思哈至巴顏烏爾搜討而西路撫遠大將軍費揚古將軍孫思克康調元邀噶爾丹於特塔克濟敗之轉戰至昭莫多大敗之斬其妻阿努喀通殺帳下厄魯特二千餘人又降其丁壯獲其牛羊一千餘萬噶爾丹既懾於

聖祖威靈不敢敵其所喪亡又皆部中精銳則自盡殺其部中婦女老弱輕騎以逃道中遺棄渾脫及贐酪無算我軍盡收其逃散部落捷奏至

聖祖自克勒和碩迴蹕

御筆銘察罕七羅拖諾山昭莫多各三十二字八月策妄阿拉布坦使來甲午

諭策妄阿拉布坦送噶爾丹策妄阿拉布坦者索諾木阿拉布坦弟也噶爾丹殺索諾木阿拉布坦僧格舊臣七人偕策妄阿拉布坦逃居土魯番畏噶爾丹故恭

朝命時噶爾丹居札薩克圖之博羅烏那罕空津札巴哈九月聖祖以噶爾丹窮蹙欲降之

親巡塞外十月至白塔進至鄂爾多斯旗噶爾使人來

詔數其犯汎界之罪又示以待喀爾喀

恩例招撫之

諭之曰以七十日爲期噶爾丹若不親至者必進兵矣十一月自東斯垓班師

命理藩院豫立台站自獨石口至寧夏並察勘行塗宿次以待方噶爾丹之遣使也授以書款息曰天下因果不相同

中國仁聖太平皇帝神靈奇異我所屬之人皆往屬之矣爾至大皇帝所觀其侍從大臣行止若何歸日商之因泣下使者至漏言於我大臣

聖祖聞而憐之故益欲其降而噶爾丹卒不至是年哈密內附三十六年二月丁亥

親征駕出寧夏策妄阿拉布坦與哈密同子都拉達爾罕執送噶爾丹子色布騰巴爾珠爾而噶爾丹逃於薩克薩圖呼魯克之南格爾特哈朗古特

大兵循賀蘭山而西時方得達賴喇嘛詐僞事乃

降敕召噶爾丹我使至薩克薩圖呼魯克噶爾丹遣人受書去不報

聖祖親征時第巴桑結遣尼瑪塘胡圖克圖至具言達賴以戊

年故今十六年小達賴生十五歲矣達賴遺言小達賴有避忌不宜參拜故未具奏今案其期達賴以今年十月二十五日出定迎呼畢爾罕坐牀振興黃教是在

大皇帝求

大皇帝勿豫示人並封進賴臨終牀簀尸鹽拌像

聖祖以其事神異且十六年兵戈之劫情事悉合

許爲秘之使尼瑪塘胡圖克圖固封表文拌像而遣之歸約以十月後再入

覲而第巴又自遣使於策妄阿拉布坦我使臣於三月約策妄阿拉布坦兵擒噶爾丹策妄阿拉布坦兵已行路遇第巴使呼曰達賴死十六年矣小達賴今年坐牀爾等各按牀坐無妄起兵也策妄阿拉布坦聞之卽率衆遙拜哭歸止爾番使者還奏

聖祖以其事已昭布卽追尼瑪塘胡圖克圖還閏三月壬午
御行營傳齊大臣及各蒙古使尼瑪塘胡圖克圖開密封出表
讀之及開拌像函而頭已墮落在旁尼瑪塘胡圖克圖大驚仆
於地衆蒙古皆合掌數異曰

大皇帝十六年來疑喇嘛今知喇嘛已死十六年十六年事果
非喇嘛所爲益信

大皇帝明並日月且至誠振興黃教喇嘛已死亦當感護法之
意於是以其事

宣示各札薩克爲第五輩達賴喇嘛誦經致賄拌像者以第五
輩達賴尸鹽證第六輩達賴化身古番王鑄像遺意也忽示凶
兆藏中皆危懼藏中初比噶爾丹失所特薩克薩圖呼魯克獸已盡
圖不與中國通至是噶爾丹失所特薩克薩圖呼魯克獸已盡

部族離散妻子死亡以戀喀爾喀地舊部多爲策妄阿拉布坦
裹去策妄阿拉布坦復於阿爾泰伺之噶爾丹不敢西使人入
藏至青海又被獲不能達所至之處頻逢怪異烈風淫雨隨之
噶爾丹心迷惑壬辰於阿察阿木塔合仰藥死其將死也欲自
殺其幼子策凌撒魯布女忠濟哈旣念色布騰巴爾柱爾在中
國安樂

聖祖又屢詔召之必非欲置之死已以倔强故至此於是僅自
戕其族丹濟拉以其尸及子女來歸至阿爾泰策妄阿拉布坦
奪之丹濟拉自以其屬人來降四月庚戌朔

聖祖御筆銘狼居胥山三十二字甲寅

迺鑿使責策妄阿拉布坦使歸噶爾丹尸及其子女乃謂其尸
已焚三十七年八月始來歸其母四十年九月來歸其女朔漢

平受賀立碑告成太學以漠北地

賜喀爾喀塔爾巴哈台山以東爲札薩克圖汗居杭愛山自鄂爾渾河以東爲圖舍圖汗居土喇河自肯特山察罕齊老山以東爲車臣汗居克魯倫河東至黑龍江庫倫諾爾南至各內札薩克西至雅爾北至俄羅斯界東西五千餘里南北三千里以準噶爾舊游牧地

賜策妄阿拉布坦

授色布騰巴爾柱爾頭等侍衛後又嫁忠濟哈於侍衛沙克都爾於是策妄阿拉布坦還和博克薩里收僧格舊人及噶爾丹餘衆復成西方大部落當

聖祖出塞顧實汗子札什巴圖倫等八古吉有勞績

賜親王公爵顧實汗部曰和碩特爲四衛拉之一其子在藏爲

達賴汗傳達顏汗至拉薩汗在青海爲鄂齊爾圖車臣汗爲阿
拉善王噶爾丹以密親殺車臣汗而阿拉善王逃入中國
聖祖指與賀蘭山游牧地青海汗絕至是八家復振策妄阿拉
布坦旣立亦娶和碩特拉藏汗姊窺藏中殷富欲奪之則先計
奏藏王第巴桑結處事不公三十九年又奏書欲攻青海
詔青海勿輕動四十一年以青海番族日繁

命喇嘛商南多爾濟招撫清釐之卽留辦青海事四十二年札
什巴圖倫孫羅卜藏丹金襲親王四十四年拉藏汗殺藏王第
巴桑結桑結旣首達賴事則傾心內附拉藏汗受策妄阿拉布
坦唆使故殺桑結中國亦以其先懷欺謾不之究也初第六輩
達賴喇嘛呼畢勒罕噶爾藏嘉睦衆出裏塘才二年青海各部
落請於西寧塔兒寺坐牀塔兒寺者西寧衛城西南四十里有

塔山爲宗喀巴出世地胞衣埋焉後人就其地立寺黃教祖廟也而藏中別訪呼畢勒罕博克達立之班禪欲入

覲又禁絕之

聖祖以桑結旣死恐策妄阿拉布坦據博克達爲亂四十五年詔取之歸京師而送噶爾藏嘉睦衆入藏時和碩特輝特皆歸順獨綽羅斯特有異議其使在藏跳梁不奉

詔五十二年

封班禪胡圖克圖爲班禪厄爾德尼

賜金冊印

察其欲求朝之誠也衛拉特分四部時曰綽羅斯特曰都爾伯特曰上爾扈特曰和碩特土爾扈特與綽羅斯特不協率衆北歸俄羅斯俄羅斯處之於額濟納河濱而都爾伯特分出一支

曰輝特仍爲四部策妄阿拉布坦取拉藏汗姊又娶土爾扈特
阿玉奇汗女離間阿玉奇子散札布台吉攜衆萬五千戶至而
沒入之阿玉奇嫂攜其子阿拉布珠兒入藏禮佛策妄阿拉布
坦聞之不得歸又不使阿玉奇入藏熬茶阿玉奇使來貢方物
聖祖厚賜之策妄阿拉布坦邀奪於路而絕土爾扈特貢道阿
拉布珠爾歸路斷則自藏投中國

聖祖賜以游牧方思所以送之歸者而阿玉奇貢使假道俄羅
斯至五月使職方郎中圖理琛由俄羅斯報之阿玉奇妹和碩
特鄂齊爾圖車臣汗妻也車臣爲噶爾丹所殺攜其女歸依阿
玉奇卽以妻阿玉奇子阿玉奇又故渾台吉外孫我使臣至阿
玉奇全家念

聖祖所以待阿拉布珠爾色布騰巴爾柱爾忠濟哈及阿拉善

王者無不感泣爭置酒請使臣請

大皇帝矣阿玉奇妹語尤切圖理琛之歸也阿玉奇曰我遣貢
必經俄羅斯數則厭慮阻遏我我屬俄羅斯持教衣冠俱不同
我終歸中國矣垂涕而別阿玉奇欲來歸道不通阿拉布珠爾
亦遂游牧甘州邊外策妄阿拉布坦左右兼并馳突奔逸不可
制將窺藏

聖祖賜之敕不得騷擾唐古忒而策妄阿拉布坦於五十四年
反來侵哈密青海及土默特還犯巴里坤哈密游擊潘至善等
擊之敗去我前使國理琛移書俄羅斯西畢爾斯科噶噶林馬
蹄飛費達拉魚持收其逃亡策妄阿拉布坦聞之亦不敢復東
拉藏汗既殺第巴桑結則日昏憤以策妄阿拉布坦姊夫也子
丹衷又娶策妄阿拉布坦女密觀可恃一聽策妄阿拉布坦唆

使策妄阿拉布坦於五十五年十月遣台吉大策楞敦多布領
綽羅斯特六千人徒步繞戈壁晝伏夜行五十六年七月至藏
至則殺拉藏汗盡并其衆入布達拉廟搜喇嘛重器送伊犁留
大策楞敦多布守藏以拉藏汗印與第巴達則遂據達賴喇嘛
博克達以自重又自將攻青海和碩特拉藏汗二子其一丹衷
在伊犁依婦居其一索爾札游牧青海策妄阿拉布坦攜之歸
既至伊犁有告丹衷詛咒者策妄阿拉布坦怒殺丹衷而以其
妻博特洛克妻唐古特之輝特韋徵和碩齊以歸道哈密爲我
師所敗也興師來犯於是振武將軍傅爾丹駐兵阿爾泰靖逆
將軍富寧安駐兵巴里坤是年城哈密五十七年置靖逆衛赤
金衛柳溝所我師經理衛藏出打箭爐裏塘而是年我將軍額
倫特都統色倫額提督康泰進兵至哈喇烏蘇糧餉爲賊所截

軍士皆沒五十八年協理將軍祁里德偕富寧安兵至闕展傳
爾丹兵至格爾額爾格策妄阿拉布坦方策應我西北路兵而
五十九年我師已南入藏平逆將軍貝勒延信兵出青海大策
楞敦多布來逆敗之定西將軍噶爾弼出打箭爐達瓦里章巴
者青海人也於裏塘謀逆副將岳鍾琪於五十八年誅之拉里
黑喇嘛自稱河州喇嘛迎師而陰遣番子截奪軍糧將軍覺亦
誅之先是三十九年桑結遣昌側集烈等據明正土司四川提
督唐希順誅之四十七年準噶爾擾藏工布土司死守不下至
是降於岳鍾琪察木多亦納款大策楞敦多布逃回伊犁是年
增西寧火器兵二千五十四年置赤金靖逆二衛五十九年傳
爾丹進兵蹂烏闌呼爾吉屯牧賊兵北顧撫遠大將軍固山貝
子允禔鎮青海延信等帥江寧杭州荊州滿洲兵四川雲南山

東緣營兵於八月由察木多送達賴喇嘛噶爾藏嘉睦榮入藏
九月庚午達賴喇嘛噶爾藏嘉睦榮坐牀我師誅厄魯特各喇
嘛取厄魯特所立達賴喇嘛博克達及桑結妻子歸於是康衛
藏阿里東西六千五百里南北五千里俱定六十年九月丁巳
立碑於達賴所居之布達拉昭地

聖祖御製文也六十一年我師進駐烏魯木齊策妄阿拉布坦
既失達賴則自於伊犁河濱立固爾札廟以奉喇嘛以五十六
年所劫布達拉供器寶之尋使人至雍正元年正月丙午
世宗憲皇帝命大臣傳諭其使臣以我

聖祖之恩不可再邀策妄阿拉布坦當自戢尋

命撤阿爾泰巴里坤兩路大兵定準噶爾使臣在第三班朝鮮
使後上朝而策妄阿拉布坦無回奏是年置安西衛及沙州所

青海喇嘛及親王羅卜藏丹金丹津渾台吉等糾蒙古番子犯邊

命撫遠大將軍年羹堯討之毀西寧衛郭隆寺大通衛郭莽寺師出青海十月降貝勒貝子公台吉二十餘人撫其衆數十萬編喇嘛所屬奔拉番子爲佐領二年二月戊午奮威將軍岳鍾琪領兵復出青海壬申大捷獲羅卜藏丹金母及輜重歸三月庚辰奏凱四月壬戌

行受俘禮誅惡頭目助逆者六月乙酉立碑太學

世宗御製文也十月岳鍾琪復出師獲丹津渾台吉及其妻子羅卜藏丹金逃青海故隸四川雲南邊外於是分其地

賜各蒙古又移山北厄魯特居之置大通衛兵而增西寧西二千里哈吉爾西北二千一百里塞爾騰馬步兵五千人城布隆

吉爾置安西衛青海與準噶爾故世姻也亦世仇羅卜藏丹金
卒歸策妄阿拉布坦策妄阿拉布坦死子噶爾丹策楞立能用
其父人亦卒匿羅卜藏丹金而與和碩特修好給索爾札及丹
衷子班珠爾戶策妄阿拉布坦又一女曰達什色布騰亦嫁和
碩特羅卜藏策楞噶爾丹策楞謂羅卜藏策楞欲歸土爾扈特
則執之亦以達什色布騰與韋徵和碩齊久之藏中熬茶使通
噶爾丹策楞不忘藏地也適羅卜藏丹金謀殺噶爾丹策楞爲
所覺卽執之欲送中國而奏書言其父已成佛矣已欲振興黃
教使天下衆生安樂

世宗怒責以非伊分位所當言而噶爾丹策楞方與藏中阿勒
布巴隆布奈札爾奈等謀奪康熙五十九年中國所立拉藏舊
臣貝子康濟察推壘擾藏地治吉頗羅奈以聞三年

命寧遠大將軍岳鍾琪征之時雲南兵由中甸察木多入藏是年改西寧衛爲西寧府築西寧西北大通白塔永安三城皆屬西寧府設青海辦事大臣署分青海蒙古二十九旗設大通總兵又升沙州爲衛而以靖逆之柳溝所隸安西四年岳鍾琪移甘肅貧民屯田沙州改柳溝所爲衛青海番子地升科以河州歸德所隸臨洮五年建安西鎮于大灣城都爾伯勒津移安西衛治之收西寧各寺明國師禪師敕印是年藏中殺康濟奈改中甸維西屬雲南六年噶爾丹策楞來犯噶斯我師擊敗之獲其將彌楚克六月青海台吉諾爾布反於屯格里我師擒之吏部尙書查郎阿至藏奉

命誅阿勒布巴等十一月打箭爐西裏塘建惠遠廟移達賴喇嘛居之時噶爾丹策楞勢熾懼其篡取之也十二月封順羅宗

爲貝子使總理藏事七年四月壬寅以征噶爾丹策楞告

太廟免甘肅錢糧募增甘肅各營馬步戰兵守兵以傅爾丹爲靖邊大將軍巴賽及查弼納爲副將軍會岳鍾琪出師是年收巴塘裏塘屬四川八年正月遷達賴喇嘛於噶達適噶爾丹策楞有送羅卜藏丹金信至五月兩大將軍皆入朝請

訓以提督紀成斌護寧遠大將軍巴賽護靖邊大將軍噶爾丹策楞窺之十二月使小策楞敦多布及梟將禡木特以二萬人劫西路牧廠於科舍圖總兵樊廷副將冶大雄拒之賊獲利去九年四月傅爾丹進屯科布多築城居之六月噶爾丹策楞來犯傅爾丹拒之軍敗於和通淖爾副將軍巴賽查弼納皆戰歿當是時西路寧遠營巴里坤馬廠被劫北路靖邊營科布多又失事西路聞之則使提督紀斌進攻烏魯木齊以分賊勢賊

亦爾路設兵大策楞敦多布駐華鄂爾奇斯小策楞敦多布駐
喀喇鄂爾奇斯我北路軍營改屯察罕洩爾噶爾丹策楞乃率
二策楞乘勝鳴角東趨犯喀爾喀額駙喀爾喀郡王策楞勒兵
敗之噶爾丹策楞遯去晉額駙策楞和碩親王授大札薩克時
圖舍圖汗十七旗滋息至三十八旗分二十旗與策楞爲賽音
諾顏札薩克親王部

今二十二旗圖舍圖亦二十旗

以鄂爾渾河以東至喀魯

特哈河爲游牧以翁金河爲王庭其喀魯特哈河以東屬圖舍
圖汗自是喀爾喀爲四部十一月傅爾丹改振武將軍以振武
將軍順承親王錫保爲靖邊大將軍進屯科布多又以康親王
爲撫遠大將軍是年城巴里坤十年塞卜屯策楞納木札爾自
烏魯木齊擾哈密岳鍾琪遣曹勣紀成斌敗之七月以張廣泗
護寧遠大將軍賊又犯科布多噶爾丹策楞潛越阿爾泰察罕

洩爾杭愛山搶奪哲卜尊丹巴胡圖克圖副將軍丹津多爾濟拒之值額駙策楞入

觀噶爾丹策楞突至據其地額駙聞之斷髮誓復仇疾馳歸力戰敗之噶爾丹策楞棄輜重走追之自辰至午卽又大敗之斬其梟將喀喇巴圖魯又率喀爾喀二萬於喀喇森齊淖爾蹶之又敗之於鄂爾渾河厄爾德尼昭賊三萬人幾盡敗卒由歸化城下綏遠將軍馬爾賽擁兵不出賊始一一脫去乃斬馬爾賽凡兩創噶爾丹策楞額駙超勇親王策楞功最多十一年設安西道分青海南巴喀地居西寧四川西藏中者王書納克書等番子三十九族四千八百八十九戶隸駐藏大臣建西寧廣惠寧佑二寺復郭莽郭隆舊制以安黃教署寧遠大將軍查郎阿副將軍張廣泗駐西路七月以定邊大將軍平郡王福彭代錫

保駐北路烏里雅蘇台尋移科布多十二年春我師越厄爾齊斯探擊賊賊移帳去噶爾丹策楞下令部中通察所掠人數時我師守巴里坤賊不能南侵又懲厄爾德尼昭之敗也不敢深入以是欲罷兵七月庚子

世宗召王大臣問應罷兵與否莊親王允祿等言應剿之大學士張廷玉等言且撫之若不順則進剿兩議上

高宗純皇帝時爲寶親王言應罷兵

世宗憲皇帝卽降旨罷兵八月量撤北路兵畫哲爾格西拉呼魯蘇爲界準噶爾兵事稍息是年春布魯克巴巴勒布入貢布魯克巴在天竺北藏西南巴勒布亦藏西南邊外國分三汗曰布彥汗曰葉楞汗曰庫枯睦汗與布魯克巴同遣使入

覲十三年撥兵駐防鄂爾渾於厄爾德尼昭迤北築城戍之而

遣使送達賴喇嘛入藏設河州鎮改大通爲協乾隆三年移臨洮歸德所屬西寧噶爾丹策楞遣人來請以阿爾泰山爲界喀爾喀游牧亦不得過札布堪

高宗純皇帝許之撤兩路大兵準噶爾得入藏熬茶如故而噶爾丹策楞復於固爾札廟南增立海努克廟自奉喇嘛凡衛拉供喇嘛者九集賽萬六百戶喇嘛六千餘人是年章嘉胡圖克圖爲達賴喇嘛請巴塘裏塘地時維西土司喇嘛廟巴塘裏塘最宏麗以達賴所降生也故章嘉爲請之

詔以巴塘裏塘商稅賜喇嘛地仍內屬四年進封頗羅柰郡王十年噶爾丹策楞死子策妄多爾濟納木札爾立而幼其姊鄂蘭巴雅爾執其政策妄多爾濟納木札爾聞其姊欲自立爲叩肯汗叩肯汗者俄羅斯女汗號也則繫其姊而亦無威儀智略

至以夜出偷狗爲樂其先世雄桀之風盡矣鄂蘭巴雅爾之夫
曰撒音伯勒克輔噶爾丹策楞幼子喇嘛達爾札攻執之篡其
位而達爾札昏暴益甚其宰桑撒拉爾率千戶來歸

高宗納之十五年藏王頗羅柰之子朱爾墨特既襲藏王欲以
藏地應準噶爾則奏請撤回駐藏大臣時駐藏大臣傅清布拉
敦以朱爾墨特逆謀不可止不如先誅之其黨必反已去其首
惡卽反亦易平卽誅朱爾墨特其黨果反四川總督策楞提督
尙書公岳鍾琪討平之遂除藏王凡衛藏事皆駐藏大臣與達
賴班禪定議付噶布倫四人行之十七年準噶爾阿睦爾撒納
殺達爾札而立渾台吉幼子布木之曾孫大策楞敦多布之孫
曰達瓦齊達爾札兄弟行也阿睦爾撒納者輝特台吉輩徵和
碩齊娶博特洛克時所生實丹衷遺腹子亦和碩特貴種也和

碩特兩汗亡拉藏汗孫在伊犁者阿睦爾撒納班珠爾及索爾
札子納哈查皆爲台吉阿睦爾撒納幼育於輝特得輝特叔親
表兄弟中與噶爾丹策楞幼子策妄達什善見綽羅斯特內亂
與班珠爾謀立策妄達什達爾札知其謀則殺策妄達什以絕
其謀阿睦爾撒納班珠爾遂挾達瓦齊三人者同逃之哈薩克
已而三人復歸舊游牧阿睦爾撒納襲殺韋徵和碩齊子沙克
都爾而并其眾遂通伊犁喇嘛帥各宰桑殺達爾札而立達瓦
齊初丹衷以兩釜夾身浴死最慘阿睦爾撒納生徧身血出其
母視曰吉利吉利無爲冤仇也及阿睦爾撒納得志其外祖策
妄阿拉布坦基壤汗位外傳而大策楞敦多布親殺拉藏汗者
二人反不仇達瓦齊達瓦齊既立阿睦爾撒納歸舊游牧有渾
台吉弟墨爾根岱青六世孫納墨庫吉拉噶拉者突領兵萬餘

至伊犁與達瓦齊分地達瓦齊戰不勝走厄彌爾舊游牧適阿睦爾撒納來會誘納默庫吉拉噶拉至雅爾殺之達瓦齊復歸伊犁四衛拉之分界也綽羅斯特治伊犁和碩特治青海都爾伯特治額爾齊斯土爾扈特治雅爾土爾扈特北去輝特治之綽羅斯特自渾台吉始爲四部盟長非有君臣之分也自噶爾丹策楞死益無遠略阿睦爾撒納據輝特欲借綽羅斯特以收和碩特都爾伯特爲四部總台吉伊犁所奉之固爾札廟海努克廟喇嘛道行卑惡畏阿睦爾撒納如虎坐食無事則又生讒慝搆之於達瓦齊於是綽羅斯特輝特遂有隙和碩特本以連姻伊犁亡而阿睦爾撒納娶都爾伯特達什女德勒克多爾濟又以妹庫克妻達什子納默庫而襲殺達什收納默庫爲台吉自遷帳於額爾齊斯當是時阿睦爾撒納令行兩部和碩特又

親屬偏向之初阿睦爾撒納欲繼渾台吉霸業故經理綽羅斯
既與達瓦齊不合則與和碩特班珠爾納哈查都爾伯特納默
庫會哈薩克踐達瓦齊舊厄彌勒地達瓦齊三遣人攻之皆不
克十九年達瓦齊自領精兵三萬又使梟將瑪木特將烏梁哈
兵八千攻額爾齊斯阿睦爾撒納倉卒戰不勝七月與其兄輝
特扎睦癸率宰桑二十餘來歸十一月至

高宗納之使處札布堪五月都爾伯特策楞策楞伍巴什已先
至和碩特班珠爾亦來碼木特亦以達瓦齊不可輔脫身來歸
綽羅斯特紛紛來降

高宗均納之使處於喀爾喀以非久計也欲以二十年秋進兵
取伊犁阿睦爾撒納以爲塞外用兵例以秋乘馬力也我馬肥
彼馬亦肥不如以春彼馬未肥不能遠遁一戰擒之無後患

高宗是之二十年二月丙辰丁巳兩路師啟行五月乙亥北路師至伊犁伊犁素無雷雨是日霹靂一聲雨下如注丁亥大捷六月庚戌擒達瓦齊準噶爾平是役也定北將軍班第定邊左副將軍阿睦爾撒納爵親王出北路定西將軍永常定邊右副將軍撒拉爾出西路北路師至綽羅斯特噶爾藏多爾濟先降百萬控絃之士皆望風降達瓦齊方縱樂飲酒不知也師逼伊犁達瓦齊走格登山遣二人出調兵爲我師所獲旣知達瓦齊所在丁亥夜緣營兵二十二人歸誠厄魯特三人斫其營皆驚大軍乘之則皆降達瓦齊走天山南至烏什阿奇木伯克霍吉斯執送之並獲羅卜藏丹金送

京師六月十月雨

行受俘禮赦其死罪而贍養之而阿睦爾撒納論功

晉封雙親王時

高宗分封四汗治衛拉欲其如喀爾喀之長久安治也重兵皆撤獨留兵五百隨班第駐伊犁河北尼楚袞經理善後事宜阿睦爾撒納知四汗已封心狂惑必欲得四部總台吉額駙科爾沁親王色布騰巴爾珠爾自軍中還

朝託之入奏期以七月下旬信可到而額駙不敢奏阿睦爾撒納乃倡言哈薩克布魯特皆畏已故不敢動藉緩朝期其與厄魯特言諱其降也曰我帶滿洲漢人及喀爾喀各蒙古來平伊犁在伊犁不服

賜衣翎頂不用定邊左副將軍印取渾台吉菊形篆印行文宰桑及鄰部渾台吉印形圓其行最遠西域皆信其能借

天朝兵歸定難也阿睦爾撒納又寄信藏中熬茶言已總四部

時善待達賴喇嘛振興黃教兼四部之意已決第欲恩出自上則無後患故未反既不得額駙信則使固爾札喇嘛見將軍中國若不使阿睦爾撒納主伊犁者喇嘛等當自刎死將軍笑而領之其事漸積上聞

高宗以阿睦爾撒納反跡已定馳

諭班第於其未發先誅之彼若入朝是借此逃也可追及則追誅之信未到阿睦爾撒納已定計離伊犁八月偕喀爾喀親王額楞青多爾濟入

朝九月至烏隆古遣人取其妻孥不得則以副將軍印交額楞青多爾濟而北竄忽反顧西行四部亂從逆者蠢起哈薩克沙津等方入貢亦應之台站斷班第禡木特及參贊大臣鄂容安等死之撒拉爾等閒道出迎師永常自木壘南退巴里坤軍糧

移屯哈密阿睦爾撒納至伊犁上書猶稱定邊左副將軍雙親王言大臣等乖張狂傲踞高坐見喇嘛口稱

大皇帝命我管轄汝等奴數勸之不聽奴慮伊犁必變奴行伊犁果變奴聞亂馳歸鎮撫求

皇上封奴阿睦爾撒納四部總台吉

高宗以其書及班第所上書隨前後

敕諭班第及烏里雅蘇台收其妻孥密旨

頒示中外革額駙色布騰巴爾珠爾親王爵

賜額楞青多爾濟自盡

命策楞爲定西將軍代永常以玉保爲參贊進討賊我師已數敗之二十一年正月玉保以大軍至特克埒距阿睦爾撒納僅一程阿睦爾撒納使人爲言吉伯什阿噶什諾爾布使言阿

睦爾撒納已就擒卽檻送至玉保與策楞卽發紅旗入報且駐軍待之阿睦爾撒納得整旅去二月我師進復伊犁阿睦爾撒納入左哈薩克左哈薩克納之同拒我師值將軍參贊不和緩師五月逮策楞玉保

命定邊右副將軍達爾黨阿爲定西將軍追阿睦爾撒納破之定邊左副將軍哈達哈至伊什爾伊什爾者左哈薩克庭也左哈薩克遠徙去數千里右副將軍之參贊富德師至右部莽格勒特伊右哈薩克亦降達爾黨阿又被紿與左哈薩克使命往還頓兵月餘而阿睦爾撒納復歸博羅塔拉伊犁復震領隊將軍和起陣亡策楞玉保亦被戕於塗定邊右副將軍兆惠自伊犁整旅出至濟爾哈朗遇賊力戰而東屯巴里坤時喀爾喀和託輝忒郡王青衮札卜以北路台站繁費且以額楞沁多爾濟

之死也曰喀爾喀青吉思汗後裔向不治罪阿睦爾撒納心欲爲惡額爾齊斯多爾濟何由知之軍興大人往來者多將日日有死罪也衆喀爾喀皆以爲然六月自十六台至二十九台一時皆撤綽羅斯特問之則皆反故伊犁益亂

高宗以超勇親王子親王成袞札卜爲定邊將軍及參贊納木札爾擒治青袞札卜台站復兆惠自十一月至二十二年正月無日不戰二十二年二月圍解兆惠兵進伊犁

詔逮達爾黨阿哈達哈時四衛拉患痘死者已過半其新封綽羅斯特汗噶爾藏多爾濟叛其姪札魯噶爾布又從而篡之部內自殘殺幾盡和碩特汗沙克都爾曼津依巴里坤以居參贊大臣雅爾哈善得

旨察其動靜輒殺之屠其部衆班珠爾亦以叛誅輝特汗巴雅

爾反殺和起又戰敗而走索倫海蘭察追至其游牧塔爾巴哈
台射而擒之三汗皆亡其部下屠戮未盡者逃入山爲喀喇沁
以食人爲生方二十年之出師也撒拉爾言阿睦爾撒納不可
專任

高宗以爲阿睦爾撒納欲平伊犁與吳三桂滅明唐王心事同
要在有以制其死命而已撒拉爾又言噶爾藏多爾濟不可爲
汗至是其言驗而厄魯特殺劫亦盡矣蒙古番子奉黃教而喜
劫掠兼佛與夜叉二義用之故其盛也喇嘛食肉殺人取皮骨
作供器及其計無復之爲喀喇沁食人其在西藏供養怪異刑
慘法酷喇嘛猶依違佛教伊犁喇嘛則益無恥又無忌憚厄魯
特以死奉之我大臣坐見喇嘛卽附阿睦爾撒納噶爾魯特反
又值青衮札卜之變謂可不通

聲教遂使厄魯特等支體屠折身首異處部落逃散千里蕭條
我師再趨伊犁時遠望火光燭天則固爾札廟遭天災火勢猛
甚喇嘛皆焦人心始知所向伊犁復平

高宗命於熱河仿固爾札式爲安遠廟又命西藏摩耶寺爲普
寧寺爲置高行喇嘛以安四衛拉特歸順之衆阿睦爾撒拉方
聞軍營失律四部構亂自博羅塔拉來觀釁至則台吉達瓦又
殺札魯噶爾卜迎阿睦爾撒納六月突遇兆惠兵跳而走兆惠
富德窮追之沿左哈薩克左哈薩克降進表貢馬追至俄羅斯
額爾圖拉喀倫七月阿睦爾撒納攜八人逃入俄羅斯俄羅斯
納之時成衮札卜改定邊左副將軍治喀爾喀事兆惠以定邊
將軍辦賊俄羅斯喀界潭瑪王拉堅稱阿睦爾撒納六月渡額
爾濟納河溺死其國置月而達瓦齊舊人自俄羅斯逃歸者言

七月於俄羅斯親見阿睦爾撒納兆惠以聞

高宗命理藩院移文俄羅斯薩那忒衙門使送阿睦爾撒納適阿睦爾撒納於俄羅斯發痘死二十三年二月俄羅斯西畢爾斯科噶噶林昇爾哈迪爾昇出其尸於恰克圖喀爾喀親王桑齋多爾濟入奏

命侍郎三泰喀爾喀親王齊巴克雅蘭丕爾馳往驗實以聞自噶爾丹犯喀倫以來中國運糧屯甲於科布多左右及嘉峪關外設軍營時時接仗誅殺者七十餘年至是厄魯特底定定邊將軍兆惠定邊右副將軍富德追沙喇過東布魯特東布魯特五部皆降初準噶爾強盛時回部爲之役天山南各居國財富地大準噶爾留其長於伊犁歲徵其財至哈薩克等行國納馬而已康熙二十一年噶爾丹以嫌紮山南阿布都爾質特三十

五年噶爾丹敗阿布都爾質特脫出來歸

聖祖優賜之遣人護至哈密使歸葉爾羌然以準噶爾勢大年納貢賦噶爾丹策楞以事疑回部則幽繫和卓木墨特死於伊犁又繫其子大和卓木布拉敦小和卓木霍集占乾隆二十年我師至伊犁於阿巴噶斯情託釋大和卓木歸葉爾羌釋小和卓木禮之於伊犁使辦回部事阿睦爾撒納反小和卓木和之我師復至逃歸兆惠使副都統阿敏道往視之將招撫之回及厄魯特木異類也初相爲仇回人恨厄魯特抄掠及多求年例私欲食其肉中國至盡除其苛條回人安樂無事卽又相與議論曰我初屬於厄魯特何可背也烏什霍吉斯不得爲義士矣且我回人何可爲人屬中國使來不可納也小和卓木議論定則挾大和卓木殺回子之異已者擇精兵守庫車拘阿敏道

而又害之事聞

高宗震怒二十三年

命靖逆將軍雅爾哈善參贊大臣哈寧阿討之互有勝負久之
兩和卓木走入葉爾羌我軍入庫車空城也於是斬雅爾哈善
以納木札爾爲靖逆將軍三泰爲參贊又調兆惠自天山北路
移師而南先是

高宗以兆惠久於外使之搜殺厄魯特反者三部逸賊畢卽回
師休息而兆惠以回部未平願助靖逆軍攻剿以蕨西師之局
書奏

高宗壯其志因而用之兆惠至阿克蘇已前降則撫庫車阿克
蘇定烏什和闐十月己未進至葉爾羌我師三千人攻之數與
戰皆勝丙寅兆惠偵知回部牲牧在城南大河之南思奪取之

由城東橋度度半橋忽斷賊盡出城中精銳及我軍血戰一晝
夜總兵高天喜副都統三寶等死之兆惠左右衝擊馬斃又易
者屢矣河南散卒漸復合力疲不能復戰穿塹喀喇烏蘇南以
死守賊築長圍困我先是兆惠遣愛隆阿以兵八百人迎靖逆
將軍納木札爾納木札爾既見愛隆阿知兆惠軍急疾趨而前
夜遇賊亦死之二十四年正月戊子富德自北路移師來援至
呼爾璜未及將軍三百里又被圍辛卯提督豆斌力戰死之兩
軍皆重困萬里外適二十三年六月

命阿里衮等檢索倫察哈爾健銳營及陝西甘肅官兵帶馬匹
糗糧赴軍營接應定邊靖逆兩軍間定邊軍用

詔促之速行於二十四年正月癸巳至馬蹄跢蹟所過塵埃全
起漲天回人來偵者不辨多少也皆駭而返我兵與愛隆阿齊

驅之夜至一處望見燈火方十餘里如螢繞忽離忽合知是呼爾滿也相率鼓噪而前呼聲震山林前旂之回軍亂富德間之方夜炊率衆犯圍出富德阿里袞轉戰赴將軍營丙申將軍整陣迎之內外夾擊我軍新舊合士皆喜而奮也丁酉盡剿其圍賊被重創入城自守我軍亦以久勞苦退保阿克蘇

高宗旣厚集兵力付兆惠兆惠旣休息脩理軍裝閏六月兩路出師兆惠收喀什噶爾富德攻葉爾羌兩和草木聞喀什噶爾失則大懼棄葉爾羌走富德邀擊於賀斯庫魯克敗之再敗之於阿拉楚拉及哈拉庫拉追至洱西洱庫拉淖拉從亡者萬餘人皆降兩和木木挈妻孥及舊僕三百人走入拔達克善拔達克善亦回部也我師索之拔達克善汗素爾坦沙聚其阿渾議諭曰布拉敦霍集占等帕爾子孫也同教經典不得執罕帕爾

子孫與人議論未定而兩和卓木欲邀鄰部亂其國爲所覺則
擊殺之送其尸中途大和卓木首爲其從者劫去拔達克善以
和卓木尸偕愛烏罕博羅爾二國來降回部平並收西布魯特
塔失干瑪爾哈則霍罕納睦干諸國安集延之浩罕四城貢表
九月庚午捷奏至

京師是役天山南北東連喀爾喀北至俄羅斯哈薩克西至哈
薩克布魯特南連藏東南連青海關地二萬餘里

高宗神武竟

兩朝未竟之志凡戰處皆立碑

天章照曜絕域矣凡大典禮皆案故事舉行二十五年二月壬
寅

聖駕郊勞將軍兆惠等於良鄉城南三里在事有功諸臣圖像

紫光閣達瓦齊霍吉斯皆封王入旗籍先是二十年

命都御史何國宗等攜儀器徧測各部天地經緯度二十二年
頒時憲書刊各蒙古節氣日出入早晚至是

遣明安圖增測立回部時節日出入表是年立哈密廳以安西
沙州柳溝靖逆赤金五衛地置安西府以柳溝衛安西衛爲淵
泉縣靖逆衛赤金衛爲玉門縣沙州衛爲燉煌縣後藏烏特噶
里畢爾奇碩拉汗入貢二十六年改大通衛爲縣二十九年伊
犁設寶伊局回部亦於葉爾羌開鑄乾隆通寶錢三十六年土
爾扈特烏巴錫間綽羅斯特和碩特輝特皆亡可以竊據伊犁
游牧也卽葉俄羅斯率衆南來六月至喀倫知伊犁規模已定
不敢逞乃籍衆歸順曰俄羅斯不興黃教願依
大皇帝興黃教之地以安部衆遂入覲於熱河是年

高宗建普提宗乘之廟於熱河祝

皇太后釐廟成而烏巴錫至烏巴錫者康熙時入貢阿玉奇曾孫也於是四衛拉之人全四衛拉惟達什達瓦妻以屬下人來歸無後編其人爲兵居於熱河其外游牧者都爾伯特汗策楞親王策楞烏巴什在舊游牧額爾奇斯東古木及土爾扈特卓里克圖汗烏巴錫其三部無汗綽羅斯特則康熙二十五年來歸一部在烏蘭烏蘇和碩特輝特先時來歸各部王台吉貝勒貝子公等雍正二年俱處之青海土爾扈特游牧汗依雅爾親王在喀拉沙爾與古木都爾伯特皆

高宗所指也三十八年以烏魯木齊置迪化州以巴里坤置鎮西府改安西府爲安西州裁安西道四十六年七月第六輩班禪厄爾德尼來朝祝

高宗七旬萬壽康熙時班禪欲來不得達至是來如達賴故事
蒙古番子皆歡喜奔走承事

詔仿札什倫布式建須彌福壽之廟於熱河班禪厄爾德尼至
接見於

避暑山莊滹泊敬誠殿班禪跪請

聖安從至京

接見於

南苑德壽寺

世祖接見達賴處也又

接見於

靜宜園昭廟使居西黃寺十一月班禪卒明年二月送之歸凡
賞賚賻贈及經由草地番子蒙古輸納其徒擁之歸者總數十

萬金而珠冠袈裟金玉磁茶器用奇珍異采不可勝計班禪親兄仲巴胡圖克圖習黃教爲班禪治商上事遂有其財弟舍瑪爾巴習紅教不得分班禪財班禪所居之札什倫布在拉薩西南五百六十里爲藏西則阿里地其言拉薩者衛也古之烏斯卽唐古特俗謂之前藏者也在打箭爐西北三千四百八十里達賴居拉薩之布達拉中國言菩提宗乘也其東則察木多爲康爲帕克巴拉呼圖克圖所居康衛藏阿里在唐爲北中西三印度地印度後退保厄納特阿克其地屬吐蕃今爲圖伯特班禪達賴轉世遷相爲師圖伯特衆所仰望班禪所居札什倫布以外地卽屬達賴凡藏阿里之戴琿第巴皆達賴補放仲巴胡圖克圖外視之私擁班禪遺貲不以分資衆皆怒舍瑪爾巴達駿廓爾喀以兵擾藏廓爾喀在藏西南喀倫外先已侵蝕巴勃

布三开地而與藏之聶拉木濟瀧江孜宗喀接五十三年廓爾喀既入舍瑪爾巴言又以藏中噶布倫丹津班珠爾等增加廓爾喀商稅予贖則和以土積忿不能平遂侵蝕藏邊聶拉木諸地藏中驚擾成都將軍鄂輝馳往治之

乾清門侍衛巴忠以解唐古特語奉

命往經理其事至則丹津班珠爾等與廓爾喀議和退回聶拉木以聶拉木外札木噶地予廓爾喀又歲予廓爾喀元寶三百立會同分執之巴忠則與聞也乃爲廓爾喀部長拉特那巴圖魯與其叔巴圖魯薩音具認罪表求

天朝罷兵將軍以其輸地具奏請

旨

高宗詔罷兵其私立會同中外皆不知也五十四年廓爾喀入

貢五十五年使臣入都祝

入旬萬壽封拉特那巴圖魯廓爾喀國王巴圖魯薩音亦加公
爵而五十六年廓爾喀大至陷邊

高宗方狩於熱河疑之旣而大臣奏理藩院侍郎巴忠落水死
乃

命窮治其事始知元許元寶仲巴胡圖克圖惜費五十五年不
肯予故廓爾喀以是年至

高宗以巴忠輸幣讓地不顧大體邊境大事又欺謾不奏當極
典而其身已死乃徙其家於邊是時廓爾喀已裹丹津班珠爾
去直趨札什倫布仲巴胡圖克圖棄其貲走前藏札什倫布有
喇嘛四五千人尙可守也濟仲喇嘛札蒼喇嘛卜於吉祥天母
傳神意言不可戰衆潰廓爾喀數百人入廟肆掠不敢東亦不

肯遂歸退并大衆伺於邊上而藏中自驚擾駐藏大臣欲援惠
遠廟故事移達賴喇嘛於泰寧

高宗怒治駐藏大臣罪革廓爾喀國王爵

命大學士福康安參贊大臣海蘭察惠齡帥師討之五十七年
五月師至以倡言失守逮濟仲喇嘛剝黃正法而解送仲巴胡
圖克圖及札蒼喇嘛於

京師鄂輝及領隊大臣成德進師收復聶拉木宗喀諸地大軍
追剿至濟瀧海蘭察成德進至熱索橋橋斷海蘭察潛師上游
札筏浮渡奪其險遂入廓爾喀界凡前後七戰七克之大軍齊
至帕朗古又克之直逼廓爾喀所居陽布廓爾喀窮蹙送出所
掠

金冊及

實件言知是

天朝物不敢燬也舍瑪爾巴已死於陽布卽送出骨殖退回札
木地繳元寶會同具永不撤茲事結請

命奏至八月

詔許其歸順赦其罪復封爵五十八年設寶藏局以贍之設鄂
博於江孜定日更定制噶布倫轄於駐藏大臣如內地例喇
嘛自明宗喀巴以來所謂汗喇嘛在古則天帝釋也至是與我
大臣平行在事有功諸臣圖像

紫光閣凡四圖像西師廓爾喀及金川臺灣也藏西北二十程
至和闐爲天山南路衛東北四千二百里至西寧又一路三千
六百七十里至西寧西寧青海大臣所建牙也自阿里以北以
東圖伯特四分青海二十九旗厄魯特汗王各旗喀爾喀八十

二旗游牧五十九旗番子數百部各土司皆喇嘛教獨回部居國行國佛教不能行中國興黃教以撫諸藩諸藩悉爲內地而喇嘛亦諸藩矣宗喀巴經言達賴班禪六七輩後卽不復轉世時班禪第七輩達賴第八輩宗喀巴若先知其事者高宗神聖百族稟命慮藩部心無所繫也

詔令達賴班禪兩呼畢勒汗當永生西土以興黃教安藩部鎮金奔巴瓶

賜布達拉兩呼畢勒罕互報差異者納名瓶中於宗喀巴前掣之吹忠降神納賄啟爭之弊盡革除喀爾喀及內札薩克胡圖克圖之呼畢勒罕出報名理藩院掣之瓶供

雍和宮兩喇嘛與內札薩克外札薩克諸喇嘛各統其衆服屬中國凡乾隆年間兩定準噶爾一定回部兩定廓爾喀皆事涉

駐劄大臣者又兩定金川一定臺灣及安南緬甸初叛後歸順
總爲

十全武功文在

皇帝嘉慶元年恭上

太上皇帝寶冊嘉慶五年二月

皇帝敬念新疆開闢始自乾隆年間

詔新疆乾隆通寶錢每年鼓鑄二成永以爲例七年六月

詔以春秋致祭伊犁山河祭文億萬年遵用乾隆二十六年所
頒者朕字敬改書

高宗純皇帝九年伊犁建社稷壇是年八輩達賴卒十一年十
二月新攝達賴羅卜藏的達以謀殺莊戶得

旨剝黃衣駐藏大臣穆克登額等嚴飭而呼畢勒罕實以十年

十二月出甸麻春科土司家是爲九輩凡游牧內札薩克科爾沁等四十九部及小部厄魯特及舊依中國土爾扈特四旗朝期分三班治事分六會

欽派大臣臨視之其駐劄大臣移徙不定今以嘉慶十一年列之治土默特者綏遠城將軍一人歸化城副都統一入治察哈

爾者察哈爾游牧都統一入副都統一入治喀爾喀者烏里雅

蘇台將軍一人初爲定邊左副將軍參贊大臣一人科布多參贊大臣一

人屬烏里雅蘇台兼治都爾庫倫辦事大臣二人治喀爾喀兼

羅斯邊事初止治西域者伊犁將軍一人總統天山南北路初

平增伊犁參贊大臣一人惠遠城領隊大臣四人惠寧城領隊大臣

一人烏魯木齊都統一入木都爾領隊副都統一入庫爾喀拉

烏蘇領隊大臣一人巴里坤領隊副都統一入古城領隊副都

統一人塔爾巴哈台參贊大臣一人即雅爾本土爾冠特輝特
特汗游牧乾隆三十領隊大臣二人喀什噶爾參贊大臣一人
一年移城楚呼楚地
山南回部參贊伊犁初治葉爾羌後移此乾隆三十年烏什亂
移烏什五十三復移此道光十一年改參贊於葉爾羌其喀
什噶爾兩幫辦大臣改協辦大臣一人葉爾羌辦事大臣一人協
爲辦事領隊大臣
理大臣一人和闐辦事大臣一人幫辦大臣一人烏什辦事大
臣一人阿克蘇辦事大臣一人英吉沙爾領隊大臣一人庫車
辦事大臣一人喀拉沙爾辦事大臣一人兼理土爾扈特親王游牧土魯番
領隊大臣一人哈密辦事大臣一人幫辦大臣一人治青海者
西寧辦事大臣一人治圖伯特者西藏辦事大臣一人幫辦大
臣一人嘉慶十二年正月